


**REUNIÓN DA COMISIÓN 5.<sup>a</sup>, SANIDADE,  
POLÍTICA SOCIAL E EMPREGO**

Día: 14.10.2014      Hora: 10:30



A Comisión 5.<sup>a</sup>, Sanidade, Política Social e Emprego, da que vostede forma parte, reunirse o próximo día 14 de outubro de 2014, ás 10:30 horas, no pazo do Parlamento.

A orde do día é a seguinte :

**Punto único.- Proposicións non de lei en Comisión**

- 1.1 17241 (09/PNC-001410)  
Grupo Parlamentario da Alternativa Galega de Esquerda  
Solla Fernández, Eva  
Sobre as actuacións que debe levar a cabo o Goberno galego en relación cos servizos relixiosos, nomeadamente os que prestan os capeláns da Igrexa católica, na rede de hospitais públicos de Galicia  
*Publicación da iniciativa, BOPG n.º 230, do 04.02.2014*
- 1.2 25348 (09/PNC-002113)  
Grupo Parlamentario dos Socialistas de Galicia  
Acuña do Campo, María Carmen e 3 máis  
Sobre o desabastecemento de fármacos nas farmacias galegas  
*Publicación da iniciativa, BOPG n.º 324, do 11.08.2014*
- 1.3 26848 (09/PNC-002257)  
Grupo Parlamentario da Alternativa Galega de Esquerda  
Díaz Pérez, Yolanda e Solla Fernández, Eva  
Sobre as actuacións que debe levar a cabo a Xunta de Galicia en relación coa situación da atención sanitaria na comarca de Ferrolterra  
*Publicación da iniciativa, BOPG n.º 342, do 17.09.2014*
- 1.4 26852 (09/PNC-002258)  
Grupo Parlamentario Mixto  
Iglesias Sueiro, Carmen  
Sobre a actuación que debe levar a cabo o Goberno galego en relación coa publicación e actualización das listas de espera para a contratación de persoal laboral do Consorcio Galego de Igualdade e Benestar  
*Publicación da iniciativa, BOPG n.º 342, do 17.09.2014*
- 1.5 27661 (09/PNC-002328)  
Grupo Parlamentario dos Socialistas de Galicia  
Gallego Calvar, María Carmen e 5 máis



PARLAMENTO DE GALICIA  
REXISTRO XERAL SAÍDA

- 6 OUT. 2014

Núm. 12270

Sobre a actuación que debe levar a cabo o Goberno galego en relación co proceso de adscrición das persoas usuarias do centro privado de Povisa aos hospitais públicos

*Publicación da iniciativa, BOPG n.º 349, do 01.10.2014*

- 1.6 27680 (09/PNC-002331)  
Grupo Parlamentario do Bloque Nacionalista Galego  
Prado Cores, María Montserrat e 2 máis  
Sobre as actuacións que debe levar a cabo o Goberno galego en relación co novo concerto asinado con Povisa e o proceso de elección pola poboación adscrita a ese centro privado do hospital de referencia para a atención sanitaria especializada

*Publicación da iniciativa, BOPG n.º 349, do 01.10.2014*

- 1.7 27707 (09/PNC-002335)  
Grupo Parlamentario do Bloque Nacionalista Galego  
Prado Cores, María Montserrat  
Sobre a posición do Parlamento de Galicia e as actuacións que debe levar a cabo o Goberno galego en relación coa situación na que se atopan as persoas que padecen esquizofrenia ou calquera outro trastorno mental grave

*Publicación da iniciativa, BOPG n.º 349, do 01.10.2014*

Os grupos parlamentarios poderán presentar emendas ás mocións e ás proposicións non de lei ata seis horas antes do inicio da sesión, o abeiro do disposto no artigo 161.2 do Regulamento.

O que lle comunico para o seu coñecemento e a súa convocatoria á devandita reunión.

Santiago de Compostela, 6 de outubro de 2014

Marta Rodríguez Arias  
Presidenta da Comisión

**Asinado dixitalmente por:**

**Marta Rodríguez Arias na data 06/10/2014 13:36:51**

# RELACIÓN DE MEMBROS DE COMISIÓN 5.<sup>a</sup>, SANIDADE, POLÍTICA SOCIAL E EMPREGO

POR ORDE ALFABÉTICA

## Mesa

Presidenta	
Marta Rodríguez Arias	P
Vicepresidenta	
Marta María Rodríguez-Vispo Rodríguez	P
Secretaria	
María Remedios Quintas Álvarez	S

## Vogais

María Carmen Acuña do Campo	S
Javier Dorado Soto	P
María Carmen Gallego Calvar	S
Carmen Iglesias Sueiro	M
Jaime Íñiguez Martínez	P
Aurelio Alfonso Núñez Centeno	P
Rosa Oubiña Solla	P
María Montserrat Prado Cores	BNG
Miguel Ángel Santalices Vieira	P
Eva Solla Fernández	AGE
Miguel Angel Tellado Filgueira	P

Reunión da Comisión 5.<sup>a</sup>, Sanidade, Política Social e Emprego

Día: 14.10.2014                      Hora: 10:30

Orde do día

1.        Proposicións non de lei en Comisión

**Reunión da Comisión 5.ª, Sanidade, Política Social e Emprego**

**Día: 14.10.2014**

**Hora: 10:30**

**Orde do día**

1.1 17241(09/PNC-001410)

Grupo Parlamentario da Alternativa Galega de Esquerda

Solla Fernández, Eva

Sobre as actuacións que debe levar a cabo o Goberno galego en relación cos servizos relixiosos, nomeadamente os que prestan os capeláns da Igrexa católica, na rede de hospitais públicos de Galicia

*Publicación da iniciativa, 230, 04.02.2014*

## Á MESA DO PARLAMENTO

**O Grupo Parlamentar da Alternativa Galega de Esquerda (ESQUERDA UNIDA-ANOVA)**, a iniciativa da súa deputada **Eva Solla Fernández** ao abeiro do artigo 160 do Regulamento da Cámara, presenta a seguinte **Proposición on de lei** para o seu debate en **Comisión** relativa aos capeláns do Servizo Galego de Saúde.

A Constitución Española garante a aconfesionalidade relixiosa do Estado así coma a liberdade ideolóxica e de culto. O Estatuto de Galicia establécese conforme a Constitución.

A pesar de este feito, os acordos do Goberno coa Santa Sede fan que as galegas e galegos todavía teñamos que estar sufragando con orzamento público a presenza de capeláns católicos nos centros sanitarios galegos. Algo totalmente fora de lugar cando os recortes da Consellería de Sanidade estanse a cebar co persoal sanitario e a calidade asistencial estase vendo xa afectada pola redución orzamentaria e a continua derivación de fondos cara á sanidade privada.

Ademáis, goza tamén a Igrexa de outros privilexios nos centros sanitarios, tales coma as capelas; Feito claramente discriminatorio con outras confesións e incompatible coa aconfesionalidade estatal independentemente de que a relixión maioritaria no noso País continúe a ser o catolicismo.

As crenzas relixiosas corresponden ao aspecto privado da vida das persoas, por iso non deben ser nunca sufragadas con orzamentos públicos e menos pertencer ás institucións sanitarias públicas.

Por todo isto, presentamos a seguinte Proposición non de lei:

O Parlamento de Galicia insta á Xunta e á Consellería de Sanidade a rematar cos privilexios da confesionalidade católica nos nosos Hospitais Públicos e para iso:

- 1.- Os capeláns deixarán de ser persoal do Servizo Galego de Saúde e deixarán, xa que logo, de percibir un salario público.
- 2.- Eliminaranse os privilexios de calquer tipo para calquera relixión na Sanidade Pública garantindo nos centros sanitarios o respecto á liberdade de culto, crenzas e opinión recollidos na lexislación.
- 3.- Co fin de garantir a liberdade de culto, crenzas e relixión no Servizo Galego de Saúde conforme á lexislación, as actuais “capelas” dos Hospitais, pasarán a ser espazos polivalentes á disposición de doentes e familiares.

Compostela, 14 de xaneiro de 2014

Asdo. Eva Solla Fernández

Deputada do G.P. da AGE

Xosé M. Beiras Torrado

Portavoz do G.P. da AGE.

**Asinado dixitalmente por:**

**Xosé Manuel Beiras Torrado na data 14/01/2014 13:04:55**

**Eva Solla Fernández na data 14/01/2014 13:05:02**



**Reunión da Comisión 5.ª, Sanidade, Política Social e Emprego**

**Día: 14.10.2014**

**Hora: 10:30**

**Orde do día**

1.2 25348(09/PNC-002113)

Grupo Parlamentario dos Socialistas de Galicia

Acuña do Campo, María Carmen e 3 máis

Sobre o desabastecemento de fármacos nas farmacias galegas

*Publicación da iniciativa, 324, 11.08.2014*

## Á Mesa do Parlamento

Partido dos  
Socialistas  
de Galicia

O **Grupo Parlamentario dos Socialistas de Galicia**, por iniciativa das súas deputadas e do seu deputado **Carmen Acuña do Campo, Manuel Vázquez Fernández, Carmen Gallego Calvar e María Quintas Alvarez**, a través do seu portavoz, e ao abeiro do disposto no artigo 160 do Regulamento da Cámara, presenta a seguinte **proposición non de lei** para o seu debate en **Comisión 5.ª, Sanidade, Política Social e Emprego**.

### Exposición de motivos

Estes días estamos asistindo a múltiples denuncias a través dos medios de comunicación sobre o desabastecemento de fármacos nas farmacias galegas, algo que provoca moita preocupación e desgusto entre os usuarios.

Posiblemente, a redución dos prezos imposta polo Estado español, pode estar provocando que os laboratorios non teñan a España entre os seus clientes favoritos e prefiran servir antes a outros países que lles pagan mellor os seus produtos.

Por suposto que o aforro farmacéutico é algo desexable para calquera xestor sanitario, pero hai que facelo adecuadamente para que non provoque consecuencias indesexables. Ademais ese xestor ten que procurar mellorar os procedementos administrativos para que non se produzan retardos nunha cuestión tan primordial como é poder dispoñer do fármaco prescrito.

A día de hoxe, a carencia ou a escaseza dun fármaco se descobre cando o doente a solicita na súa farmacia habitual e, dende alí, comprobamos que non está dispoñible, nin no laboratorio nin no distribuidor. Esa situación é comunicada a través dos colexios farmacéuticos á Subdirección de Farmacia da Consellería de Sanidade que comproba a carencia.

Todo este proceso leva o seu tempo e, mentres tanto, o doente non dispón da medicina que precisa tomar. Tempo que dedica a peregrinar de farmacia en farmacia, case sempre sen resultados.

Sen falar de que a receita electrónica impide ao farmacéutico dispensar outro fármaco similar, en caso de non dispor do receitado.

Dado que Sanidade é o pagador habitual da industria farmacéutica, este proceso debería de funcionar ao revés e ser a propia industria a que con antelación suficiente avisara ao sistema sanitario de que dispón de poucos envases de determinado fármaco, para que así o sistema puidera tomar medidas que evitasen ou paliasen eses desabastecementos que se están a producir de forma descontinua, pero cada día con máis frecuencia.

E nesa liña vai a nosa proposta e por iso, o Grupo Parlamentario dos Socialistas de Galicia presenta a seguinte proposición non de lei para o seu debate en Comisión:

O Parlamento galego insta a Xunta de Galicia a que:

1. Solicite a industria e laboratorios farmacéuticos, información detallada, puntual e facilitada coa antelación suficiente sobre a dispoñibilidade e reservas dos medicamentos que habitualmente lle merca para poder prever e declarar con prontitude os posibles desabastecementos e poñer medidas para evitalos.
2. Esa información sexa trasladada aos profesionais prescritesores.

Pazo do Parlamento, 24 de xullo de 2014

Asdo.: Carmen Acuña do Campo  
Manuel Vázquez Fernández  
Carmen Gallego Calvar  
María Quintas Alvarez

Deputadas e deputado do G.P. dos Socialistas de Galicia

Asdo.: José Luis Méndez Romeu  
Portavoz do G.P. dos Socialistas de Galicia

**Asinado dixitalmente por:**



PARLAMENTO DE GALICIA  
REXISTRO XERAL ENTRADA  
Data asento: 28/07/2014 12:17  
Nº Rexistro: 25348  
Data envío: 28/07/2014 12:17:48.980



---

 Grupo Parlamentario

**María Carmen Acuña do Campo na data 28/07/2014 11:37:46**

**Manuel Vázquez Fernández na data 28/07/2014 11:37:52**

---

**María Carmen Gallego Calvar na data 28/07/2014 11:37:58**

Partido dos  
Socialistas  
de Galicia

**María Remedios Quintas Álvarez na data 28/07/2014 11:38:00**

**José Luís Méndez Romeu na data 28/07/2014 11:38:06**

---

**Reunión da Comisión 5.ª, Sanidade, Política Social e Emprego**

**Día: 14.10.2014**

**Hora: 10:30**

**Orde do día**

1.3 26848(09/PNC-002257)

Grupo Parlamentario da Alternativa Galega de Esquerda

Díaz Pérez, Yolanda e Solla Fernández, Eva

Sobre as actuacións que debe levar a cabo a Xunta de Galicia en relación coa situación da atención sanitaria na comarca de Ferrolterra

*Publicación da iniciativa, 342, 17.09.2014*

## Á MESA DO PARLAMENTO GALEGO

O grupo parlamentar da Alternativa Galega da Esquerda, por medio das súas deputadas Yolanda Díaz Pérez e Eva Solla Fernández, ao abeiro do recollido no artigo 160 do Regulamento da Cámara presenta a seguinte **proposición non de lei para o seu debate na comisión**, relativa aos recortes en sanidade e a correspondente saturación dos servizos sanitarios en Ferrolterra.

### Exposición de motivos

Cando se dirixe a sanidade pública como se fora un negocio os resultados están á vista: saltan as alarmas de colapsos nas urxencias un día en Vigo e outro en Ferrol, cando non en Compostela entre listaxes de espera en “a” e en “b”. O mal xeral que sofre a sanidade pública galega é a dun goberno que pretende favorecer o negocio das empresas privadas do sector sanitario e recortar servizos e prestacións á cidadanía dese dereito recoñecido na Constitución e o Estatuto que é a sanidade pública.

Ataque ideolóxico contra o sistema sanitario público que se concreta para esta iniciativa no caso concreto de Ferrol. Esta área sanitaria tan maltratada pola Xunta que estragou compromisos previos que terían redundado nunha mellora da atención sanitaria. Agora e xa en xullo as urxencias saturadas ao comezar setembro, profesionais e traballadoras e traballadores saturados, falta de camas e 20 doentes coa nota médico do ingreso na procura dunha cama... No entanto, unha escandalosa infrautilización dos recursos sanitarios en atención ao deus mercado e o seu profeta, os recortes.

Se enchen pasillos cando a terceira planta do hospital naval resta pechada malia as advertencias das traballadoras e traballadores acerca da súa necesidade, que se concreta en que dispón de 32 camas de adultos; ou hai saturación nas urxencias cando o Novoa Santos está habitado polas apenas polas pantasma da deixación e quizabes a privatización.

Situación de infrautilización e peche de unidades que só atende a mellorar as contas de Tánatos que presenta logo Feijóo para conquistar os aplausos de Rajoy e Merkel e para desviar doentes ao centro concertado desa área sanitaria, na confianza de que non se obturarán as portas xiratorias que estercan as relación político-empresariais. Desvío que se practica con opacidade e negando información ás centrais sindicais representativas.

En atención ao sinalado, o grupo parlamentar da Alternativa Galega da Esquerda achega a seguinte proposición non de lei para o seu debate na comisión:

- O Parlamento Galego insta á Xunta a reabrir de inmediato a terceira planta do Hospital Naval de Ferrol.
- O Parlamento Galego insta á Xunta a facer públicos os datos de desvío de doentes ao centro concertado Juan Cardona dende 2009 ate o presente.
- O Parlamento Galego insta á Xunta a elaborar e publicar os tempos que transcorren entre a nota médica que confirma o ingreso dun doente e a subida a planta de este.

Compostela, 5 de setembro do 2014.

Asdo. Yolanda Díaz Pérez

Asdo. Eva Solla Fernández

**Asinado dixitalmente por:**

**Yolanda Díaz Pérez na data 05/09/2014 14:04:19**

**Eva Solla Fernández na data 05/09/2014 14:04:26**



Reunión da Comisión 5.<sup>a</sup>, Sanidade, Política Social e Emprego

Día: 14.10.2014

Hora: 10:30

Orde do día

1.4 26852(09/PNC-002258)

Grupo Parlamentario Mixto

Iglesias Sueiro, Carmen

Sobre a actuación que debe levar a cabo o Goberno galego en relación coa publicación e actualización das listas de espera para a contratación de persoal laboral do Consorcio Galego de Igualdade e Benestar

*Publicación da iniciativa, 342, 17.09.2014*

## Á MESA DO PARLAMENTO DE GALICIA.

O **G. P. Mixto**, a iniciativa da súa Deputada e voceira, Carmen Iglesias Sueiro, ao abeiro do establecido no regulamento desta cámara, presenta a seguinte **Proposición Non De Lei** para o seu tratamento en comisión para que as listas de agarda para contratación do persoal laboral do Consorcio Galego de Igualdade e Benestar sexan públicas.

O Consorcio Galego de Igualdade e Benestar, dende a súa formación, mantén unha opacidade; falta de información e falta de transparencia na xestión das listas de agarda para persoal laboral de Escolas Infantís, Centros de Día, Centros de Maiores, e Servizos Centrais, que non son de coñecemento público.

Isto impide que as persoas anotadas poidan coñecer en todo momento a súa situación e que se respecte a súa orde, tal e como sucede noutras listas de agarda da Xunta de Galicia que son públicas.

Todo isto ven traendo reiteradas queixas por parte das organizacións sindicais e de moitas das persoas incluídas nas listaxe que consideran que non se están a respectar as bases que as regulan e que se vulneran, sistematicamente, a orde de prelación e o dereito á información.

Poucas son, sen embargo, as que se atreven a denunciar. Algo moi comprensible xa que a opacidade, falta de transparencia e pouca información pública facilitan a arbitrariedade nas contratacións e, polo tanto, a toma de represalias contra as persoas que manifesten a súa lexítima desconformidade.



## GRUPO MIXTO

PARLAMENTO DE GALICIA

Ademais esa falta de información pública produce indefensión ás persoas integrantes da listaxe xa que fai pouco demostrables os feitos fronte a reclamacións ou recursos oficiais ao non dispor de documentación para avalalas dado que as consultas só se obteñen de forma telefónica e individual, sen poder identificar nunca ás persoas que están diante ou detrás nas listas.

Por estes motivos, formúlase a seguinte **proposición non de lei** para o seu tratamento en comisión:

O Parlamento de Galicia insta á Xunta de Galicia, con carácter urxente, a:

1.- Obrigar ao Consorcio Galego de Igualdade e Benestar a facer públicas e accesibles as listas de agarda para persoal laboral a través da páxina web de dito ente.

2.- A que as listas de agarda sexan actualizadas periodicamente imitando o procedemento utilizado noutras listas de agarda para persoal da Xunta de Galicia.

Pazo do Parlamento a venres, 05 de setembro de 2014

Asdo.: Carmen Iglesias Sueiro

Deputada e Voceira do G.P. Mixto do Parlamento de Galicia

**Asinado dixitalmente por:**

**Carmen Iglesias Sueiro na data 05/09/2014 15:01:12**



**Reunión da Comisión 5.ª, Sanidade, Política Social e Emprego**

**Día: 14.10.2014**

**Hora: 10:30**

**Orde do día**

1.5 27661(09/PNC-002328)

Grupo Parlamentario dos Socialistas de Galicia

Gallego Calvar, María Carmen e 5 máis

Sobre a actuación que debe levar a cabo o Goberno galego en relación co proceso de adscrición das persoas usuarias do centro privado de Povisa aos hospitais públicos

*Publicación da iniciativa, 349, 01.10.2014*

## Á Mesa do Parlamento

O Grupo Parlamentario dos Socialistas de Galicia, por iniciativa das súas deputadas e dos seus deputados **Carmen Gallego Calvar, Carmen Acuña do Campo, Manuel Vázquez Fernández, María Quintas Alvarez, Abel Losada Alvarez e José Manuel Gallego Lomba** a través do seu portavoz e ao abeiro do disposto no artigo 160 do Regulamento da Cámara, presenta ante esa Mesa a seguinte **proposición non de lei** para o seu debate en **Comisión 5.ª, Sanidade, Política Social e Emprego**.

Partido dos  
Socialistas  
de Galicia

### Exposición de motivos

O Goberno galego publicou a primeiros do presente mes unha instrución, a 7/2014, na que se abre o prazo para que as persoas usuarias actualmente adscritas ao centro privado de Povisa poidan solicitar o cambio a hospitais públicos.

Este proceso, que afecta de maneira relevante á poboación da Comarca de O Morrazo, en concreto dos concellos de Cangas e Moaña, adscrita a Povisa, está cheo de falsidades, medias verdades, opacidade e traslada demasiadas incertezas á poboación susceptible de ser beneficiaria do cambio a un hospital público.

A primeira das falsidades é que na actualidade, e sobre todo despois das decisións políticas adoptadas polo goberno Feijoo na construción do novo hospital de Vigo (máis pequeno, máis caro e privatizado), a poboación que atende Povisa en virtude do concerto que ten co Sergas non é materialmente posible trasladala toda a un ou varios centros públicos, senón non sería necesario ter ese concerto recentemente renovado entre o Sergas e Povisa.

A realidade é que nin agora nin no futuro, cando ese novo hospital estea funcionando a pleno rendemento, se pode obviar o concerto co hospital privado, precisamente esa foi unha decisión adoptada para claramente favorecer a iniciativa privada.

A opacidade e medias verdades derivan de que este é un proceso falto dunha información pormenorizada do que significa o cambio, de que prestacións hai no hospital privado e a cales se podería acceder e en que



## Grupo Parlamentario

Partido dos  
Socialistas  
de Galicia

condicións nos hospitais públicos, de que vai pasar coas persoas que están nas listas de espera máis altas de Galicia, porque hai unha clara intencionalidade de que este sexa un proceso destinado ao fracaso, a que haxa poucas persoas que se cambien de centro hospitalario, para xustificar a mesma existencia do concerto con Povisa e a deriva da consellería e do Goberno Feijoo cara a privatización da sanidade.

As incertezas, ocasionadas por esa opacidade, provocan unha grande preocupación entre as persoas usuarias á hora de tomar unha decisión porque estamos falando da súa saúde, e teñen medo a perder quendas, lugares nas listas de espera, etc.

Por este motivo, e dado a importancia que ten para a poboación da comarca poder optar a un centro hospitalario público para acceder á sanidade nas mesmas condicións que os demais galegos e galegas, o Grupo Parlamentario dos Socialistas presenta a seguinte proposición non de lei para o seu debate en Comisión:

O Parlamento galego insta a Xunta de Galicia a:

1. Paralizar o proceso de adscrición das persoas usuarias de Povisa aos centros públicos ata que estén garantidas cando menos as seguintes cuestións:
  - a) Información individualizada e pormenorizada a cada unha das persoas usuarias das novas condicións de asistencia sanitaria, carteira de servizos e alternativas no sistema público aos servizos non cubertos polo concerto con Povisa.
  - b) Acceso por parte das persoas usuarias, organizacións que as representan, concellos implicados, organizacións políticas, sindicais, etc. do texto íntegro do novo concerto do Sergas con Povisa.
  - c) Habilitar servizos de información específicos, a través de xanelas exclusivas ao efecto, nos centros de saúde de Cangas e Moaña, para as persoas usuarias que poidan estar interesados no trámite do cambio aos hospitais públicos.



 Grupo Parlamentario

2. Unha vez cumprido o anterior, ampliar o prazo de solicitude de cambio aos hospitais públicos coa suficiente información e publicidade.

Partido dos  
Socialistas  
de Galicia

Pazo do Parlamento, 24 de setembro de 2014

Asdo.: Carmen Gallego Calvar  
Carmen Acuña do Campo  
Manuel Vázquez Fernández  
María Quintas Alvarez  
Abel Losada Alvarez  
José Manuel Gallego Lomba  
Deputadas e deputados do G.P. dos Socialistas de Galicia

Asdo.: José Luis Méndez Romeu  
Portavoz do G.P. dos Socialistas de Galicia

**Asinado dixitalmente por:**

**María Carmen Gallego Calvar na data 24/09/2014 18:13:48**

**María Carmen Acuña do Campo na data 24/09/2014 18:13:54**

**Manuel Vázquez Fernández na data 24/09/2014 18:13:59**

**María Remedios Quintas Álvarez na data 24/09/2014 18:14:05**

**Abel Fermín Losada Álvarez na data 24/09/2014 18:14:11**

**José Manuel Gallego Lomba na data 24/09/2014 18:14:15**

**José Luís Méndez Romeu na data 24/09/2014 18:14:19**

**Reunión da Comisión 5.ª, Sanidade, Política Social e Emprego**

**Día: 14.10.2014**

**Hora: 10:30**

**Orde do día**

1.6 27680(09/PNC-002331)

Grupo Parlamentario do Bloque Nacionalista Galego

Prado Cores, María Montserrat e 2 máis

Sobre as actuacións que debe levar a cabo o Goberno galego en relación co novo concerto asinado con Povisa e o proceso de elección pola poboación adscrita a ese centro privado do hospital de referencia para a atención sanitaria especializada

*Publicación da iniciativa, 349, 01.10.2014*





### Á Mesa do Parlamento

O **Grupo Parlamentar do Bloque Nacionalista Galego (BNG)**, por iniciativa das deputadas **Montserrat Prado Cores** e **María do Carme Adán Villamarín** e do deputado **Daniel Rodas Chapela**, ao abeiro do disposto no Regulamento da Cámara, formula a seguinte **Proposición non de lei para o seu debate en Comisión**, relativa á publicación do concerto entre o SERGAS e o Policlínico POVISA ás garantías asistenciais e laborais que se derivan do mesmo e á paralización do procedemento de elección de provisor de atención sanitaria especializada da poboación adscrita a POVISA.

A Área Sanitaria de Vigo está a padecer un claro déficit de infraestruturas sanitarias como demostran as intolerables listas de espera cirúrxicas e para consultas e probas diagnósticas que padecen. Nesta situación o Novo Hospital de Vigo continua a súa construción, con anos de retraso, consolidando o modelo privatizador polo que apostou a Consellería de Sanidade. Este modelo suporá perda de postos de traballo na sanidade pública e a precarización do persoal que realizará as actividades privatizadas.

O Novo Hospital será máis pequeno e non estará dotado dos recursos necesarios para atender ao 100% da cidadanía.

Ademais anúncianse máis recortes e privatizacións como a que supón sacar do Novo Hospital o Laboratorio Central e situalo no H. Meixoeiro, o que facilita a súa privatización.

Neste contexto, o SERGAS asina un novo concerto con POVISA. Un



Concerto que condicionou o deseño do conxunto da Área Sanitaria, segregando recursos da Sanidade Pública para financiar o Concerto que suporá 75 millóns de euros anuais que sairán dos impostos de tod@s @s galeg@s, aos que previsibelmente haberá que engadir outros custes como a facturación dos servizos de referencia ou o gasto farmacéutico, pagando 540 € por tarxeta sanitaria. Supón a entrega a unha empresa privada dunha parte importantísima da atención especializada do sur da provincia de Pontevedra.

Resulta do todo inexplicábel que un concerto desta cuantía económica e de tanta relevancia para a atención sanitaria de miles de persoas non se faga público e se manteña agochado por parte da Xunta.

Tras a sinatura deste concerto, o SERGAS publicou a Instrución 7/2014 sobre a regulación do prazo e do procedemento mediante o cal os “beneficiarios da Seguridade Social” asignados á área de POVISA poidan elixir provisor de Atención Sanitaria Especializada, é dicir, a cidadanía que ten de referencia para atención especializada POVISA pode elixir ter de referencia ao CHUVI.

Na citada Instrución só se recolle o prazo do 30 de novembro para solicitar a adscrición aos hospitais de referencia no CHUVI, pero non se garante unha información personalizada a cada usuaria e usuario actual de POVISA, informando da carteira de servizos de POVISA segundo se recolla no novo Concerto e das alternativas no CHUVI. Tampouco se informa de en que condicións se realizará o cambio para as e os doentes que están con tratamentos en marcha ou en listas de espera para consultas, exploracións complementarias ou para intervencións cirúrxicas.

Por todo o exposto, o Grupo Parlamentar do Bloque Nacionalista Galego



presenta a seguinte proposición non de lei para o seu tratamento en comisión:

“O Parlamento de Galiza, insta ao Goberno galego a:

-Que faga públicos os termos do novo concerto con POVISA, xa que considera inadmisíbel que un concerto da administración pública cunha empresa privada, que custará 75 millóns de euros, permaneza agochado.

-Que defina as actuacións que ten previstas para garantir que POVISA atende @s doentes que teña asignados con ratios de calidade e de profesionais equiparables á media dos Hospitais públicos do Servizo Galego de Saúde.

-Que faga públicas as actuacións que ten previsto por en marcha para reducir as intolerables listas de espera que actualmente ten POVISA.

-Que informe @s usuari@s actualmente asignados a POVISA da carteira de servizos recollida no Novo Concerto e das alternativas no CHUVI, e en que condicións se realizará o cambio para @s doentes que están con tratamentos en marcha ou en listas de espera para consultas, exploracións complementarias, para intervencións cirúrxicas...

-Que se paralice, en tanto non se informe debidamente aos usuarios/as asignados/as a POVISA, o actual proceso posto en marcha coa Instrución 7/2014 sobre a regulación do prazo e do procedemento mediante o cal os “beneficiarios da Seguridade Social” asignados á área de POVISA poidan elixir provisor de Atención Sanitaria Especializada.

-Que adopte as medidas oportunas para impedir que POVISA continúe a despedir persoal e a precarizar as súas condicións de traballo, incluso incumprindo sentencias xudiciais, unha vez asinado o novo concerto que, como recoñece a propia



PARLAMENTO DE GALICIA  
REXISTRO XERAL ENTRADA  
Data asento: 25/09/2014 16:53  
Nº Rexistro: 27680  
Data envío: 25/09/2014 16:53:48.919



BLOQUE NACIONALISTA GALEGO  
OFICINA PARLAMENTAR  
Parlamento de Galiza  
Rúa do Hórreo, s/n. Tel. 0034 981 551 545  
Fax. 0034 981 551 420. Fax prensa: 0034 981 551 421  
gp-bng@parlamentodegalicia.es  
15702 Santiago de Compostela  
Galiza

Consellería, garante a estabilidade da empresa nos próximos dez anos.”

Santiago de Compostela, 25 de setembro de 2014

Asdo.: **Montserrat Prado Cores**

**Daniel Rodas Chapela**

Deputada e deputado do G.P. do BNG

**María do Carme Adán Villamarín**

Portavoz s. do G.P. do BNG

**Asinado dixitalmente por:**

**María Montserrat Prado Cores na data 25/09/2014 16:50:22**

**María do Carme Adán Villamarín na data 25/09/2014 16:50:28**

**Daniel Rodas Chapela na data 25/09/2014 16:50:29**

**Reunión da Comisión 5.ª, Sanidade, Política Social e Emprego**

**Día: 14.10.2014**

**Hora: 10:30**

**Orde do día**

1.7 27707(09/PNC-002335)

Grupo Parlamentario do Bloque Nacionalista Galego

Prado Cores, María Montserrat

Sobre a posición do Parlamento de Galicia e as actuacións que debe levar a cabo o Goberno galego en relación coa situación na que se atopan as persoas que padecen esquizofrenia ou calquera outro trastorno mental grave

*Publicación da iniciativa, 349, 01.10.2014*



### Á Mesa do Parlamento

O **Grupo Parlamentar do Bloque Nacionalista Galego (BNG)**, por iniciativa da deputada **Montserrat Prado Cores**, ao abeiro do disposto no Regulamento da Cámara, formula a seguinte **Proposición non de lei para o seu debate en Comisión**, relativa ás accións a realizar en favor d@s enferm@s de saúde mental.

O 10 de outubro celébrase o Día Mundial da Saúde Mental, e seguindo o chamado da OMS co seu lema “Vivindo con esquizofrenia”, quérese facer visíbel a difícil situación na que se atopan unha boa parte dos cidadáns que padecen esquizofrenia ou outro *trastorno mental grave* -un colectivo estimado nuns 75.000 galegos-, co obxectivo de alertar aos poderes públicos responsábeis, e encetar un cambio real nas súas condicións de vida. Lamentablemente, os datos estatísticos obrigan a unha detida reflexión: unha esperanza de vida 20 anos inferior á poboación xeral; a máis alta taxa de suicidios do estado español; sete veces máis risco de sufrir desemprego; e os máis altos índices de exclusión social.

A crise económica veu actuar dramaticamente nunha dupla fronte, por unha banda, a política de recortes nos servizos públicos, nomeadamente sociais e sanitarios, conlevou o deterioro na atención especializada e na cobertura das necesidades sociais básicas destes doentes, o que condicionou unha maior morbimortalidade; por outra, o aumento da desigualdade e dos niveis de pobreza, tanto en intensidade –máis pobreza-, como en extensión –máis pobres, chegando a sectores cada vez máis amplos-, fixo agromar trastornos psíquicos, como expresión dos elevados niveis de sufrimento que moitas persoas están a soportar. Factores como o



desemprego, a redución da protección social e sanitaria públicas, o incremento da emigración, a perda da vivenda, máis a xeneralizada sensación de inseguridade ante o futuro, son factores que agravan unha situación, xa moi preocupante mesmo antes do comezo da crise. As persoas con *trastorno mental grave*, máis as que enferman nunha reacción ao empobrecemento, atópanse nun círculo de difícil saída: maior dano á saúde, e menos recursos para seren atendidos.

Por todo o exposto, o Grupo Parlamentar do Bloque Nacionalista Galego, facéndose eco da petición do Movemento Galego da Saúde Mental, presenta a seguinte proposición non de lei para o seu tratamento en comisión:

“O Parlamento de Galiza asume o compromiso de intensificar o seguimento das políticas da Xunta de Galiza neste eido e de desenvolver as iniciativas lexislativas e propostas que procedan para avanzar na concreción das orientacións antes expostas.

O Parlamento de Galiza insta ao Goberno galego a:

-Instar aos poderes públicos, institucións públicas e privadas, axentes sociais e económicos, e á sociedade no seu conxunto, a asumir un compromiso real contra o estigma que sofren as persoas afectadas por trastornos psíquicos. Isto debe conlevar accións de discriminación positiva e un reflexo nos investimentos para facilitalo. En tanto que compre rematar coa discriminación social e laboral deste colectivo.

-Poñer equitativamente ao alcance de todo aquel que o precise, os tratamentos psicolóxicos e médicos, e as intervencións sociais, que teñan demostrada eficacia para mellorar o dano causado pola enfermidade mental, no



coñecemento de que, con asistencia apropiada, actitudes solidarias e apoios axeitados, unha boa parte dos enfermos poderán desenvolver unha vida en condicións de saúde, normalidade e integración social.

-Que aumente o seu esforzo, sensibilidade e compromiso coa atención á saúde mental, e máis en particular co colectivo de persoas afectadas por un *trastorno mental grave*. Iso require, en cumprimento das orientacións dos organismos internacionais de referencia neste ámbito, a adopción urxente de accións de goberno guiadas polas seguintes orientacións:

- A atención á saúde mental debe ser prioritaria para as políticas sanitarias públicas, mediante o deseño, promulgación e aplicación de estratexias e plans específicos. Estes terán en conta o risco agravado para a saúde mental do contexto actual de crise socioeconómica. Elaboración periódica dun Plan Estratéxico de Saúde Mental.
- Reforzo da atención sanitaria ás persoas con *trastorno mental grave*, mediante as dotacións profesionais e materiais suficientes, unha organización de recursos axeitada, e a oferta de programas asistenciais específicos e eficaces. En particular no eido máis deficitario: o da atención comunitaria e da rehabilitación psicosocial. Presentación de Plans de Necesidades e Plans Funcionais para todas as áreas sanitarias para a atención dos doentes con *trastorno mental grave*.
- Potenciar as medidas de protección social ás persoas afectadas por *trastorno mental grave* e ás súas familias. Cumprimento da *Lei de Dependencia*.





PARLAMENTO DE GALICIA  
REXISTRO XERAL ENTRADA  
Data asento: 25/09/2014 18:14  
Nº Rexistro: 27707  
Data envío: 25/09/2014 18:14:08.184



BLOQUE NACIONALISTA GALEGO  
OFICINA PARLAMENTAR  
Parlamento de Galiza  
Rúa do Hórreo, s/n. Tel. 0034 981 551 545  
Fax. 0034 981 551 420. Fax prensa: 0034 981 551 421  
gp-bng@parlamentodegalicia.es  
15702 Santiago de Compostela  
Galiza

- Desenvolver políticas activas de emprego dirixidas especificamente a promover a incorporación e sostemento na actividade laboral normalizada das persoas con *trastorno mental grave*.
- Impedir a promulgación de calquera medida legal que actúe incrementando o estigma ou diferenciando negativamente ás persoas con *trastorno mental grave*, nomeadamente as actuais propostas de reforma do Código Penal.”

Santiago de Compostela, 25 de setembro de 2014

Asdo.: **Montserrat Prado Cores**

Deputada do G.P. do BNG

**Francisco Xesús Jorquera Caselas**

Portavoz do G.P. do BNG

**Asinado dixitalmente por:**

**María Montserrat Prado Cores na data 25/09/2014 18:00:04**

**Francisco Xesús Jorquera Caselas na data 25/09/2014 18:00:10**